



**Sud Bosne i Hercegovine**  
**Суд Босне и Херцеговине**

---

Broj; S1 3 Iž 037670 20 Iž  
Sarajevo; 16.10.2020.godine

Sud Bosne i Hercegovine, u drugostepenom vijeću sastavljenom od sudija Vesne Trifunović kao predsjednika vijeća, Dinke Bešlagić Čovrk i Srete Crnjak kao članova vijeća, odlučujući o žalbi Džambas Dušana , Laze Kostića 14, Đurđevo 21239, Republika Srbija ,koji osporava Odluku Centralne izborne komisije broj 05-1-07-1-998/20 od 01.10.2020. godine, u nejavnoj sjednici, održanoj dana 16.10.2020. godine, donio je

**R J E Š E N J E**

Žalba se odbija.

**O b r a z l o Ź e n j e**

Centralna izborna komisije Bosne i Hercegovine je Odlukom broj 05-1- 07-1-998/20 od 01.10.2020. godine odbila upis u izvod iz Centralnog biračkog spiska za glasanje izvan Bosne i Hercegovine podnosioca prijave , po podnesenim prijavama do 01.09.2020. godine jer nisu ispunjeni uslovi propisani članom 3.15 stav (1),(2) i (3) Izbornog zakona Bosne i Hercegovine.

Žalitelj pobija navedenu Odluku CIK BiH navodeći da se ne nalazi na spisku za glasanje van BiH, te u prilogu dostavlja obrazac prijave PRP-1 sa dokumentacijom.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovna navodeći da je odbila upis u izvod iz Centralnog biračkog spiska za glasanje izvan BiH po prijavi Džambas Dušana , s obzirom da su za podnositelje žalbe dostavljene dvije prijave u kojima su navedene različite adrese na koje će biti upućen glasački materijal, te da imenovani nije dostavio Potvrdu nadležnog organa o prebivalištu/boravištu izvan BiH.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da žalba nije osnovana.

Tačna adresa stanovanja državljanina BiH koji privremeneo živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan CIK obavjestiti o promjeni podataka koje je predhodno dostavio i to do isteka roka utvrđeno za podnošenje prijave za glasanje van BiH.

U konkrentom slučaju prijave za glasanje morale su biti dostavljene do 01.09.2020. godine, sa kojim danom je žalitelj dostavio više prijava, odnosno dvije prijave i to u prvoj prijavi navedena je adresa Laze Kostića 14, Đurđevo, Srbija, dok je u drugoj prijavi navedena adresa Marka Kraljevića 106, Đurđevo, Srbija.

Odredbom člana 3.15 Izbornog zakona propisano je da državljanin BiH koji živi u inostranstvu, a koji ima biračko pravo u skladu sa ovim zakonom i upisan je u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je podnijeti prijavu Centralnoj izbornoj komisiji BiH prije roka koji utvrdi CIK BiH u periodu prije raspisivanja izbora. Osim prijave koju potpisuje dužan je priložiti i dokaz o identitetu podnosioca prijave i tačnoj adresi u inostranstvu. Žalitelj je bio dužan dostaviti potvrdu nadležnog organa o prebivalištu/boravištu izvan BiH. S obzirom da žalitelj nije dostavio Potvrdu nadležnog organa o prebivalištu/boravištu izvan BiH, pravilna je odluka Centralne izborne komisije BiH kojom je odbila upis u izvod iz Centralnog biračkog spiska za glasanje izvan BiH po prijavi žalitelja Džambas Dušana.

Ustvari, pravilan je zaključak CIK-a BiH da se druga zaprimljena prijava nije mogla smatrati obaviješću o promjeni podataka iz člana 3.16 stav (1) Izbornog zakona BiH, pa kako nije bilo moguće utvrditi koja od podnesenih prijava je vjerodostojna, što je žalitelj bio dužni dokazati u skladu sa članom 3.15 stav (1) i (7) Izbornog zakona BiH, jer bez dostavljene Potvrde nadležnog organa o prebivalištu/boravištu izvan BiH, pravilan je zaključak CIK BiH da se radi o zloupotrebi biračkog prava. Osim toga žalitelju nije oduzeto biračko pravo za Lokalne izbore 2020. godine da glasa na redovnom biračkom mjestu u opštini u kojoj ima prijavljeno prebivalište u Bosni i Hercegovini.

Na ovaj način pravilno su utvrđene relevente činjenice i pravilno primjenjene odredbe materijalnog prava.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
SUDIJA  
Vesna Trifunović**